

四庫全書

集部

欽定四庫全書

集部

元詩選初集卷四十八

詳校官中書<sub>臣</sub>王鵬

主事銜<sub>臣</sub>徐以坤覆勘

總校官編修<sub>臣</sub>王燕緒

校對官檢討<sub>臣</sub>溫常綬

謄錄監生<sub>臣</sub>李約

欽定四庫全書

元詩選初集卷四十七

庶吉士顧嗣立編

杜徵君本

本字伯原臨江清江人博學善屬文江浙行省  
丞相忽剌木得其所上救荒策大奇之力薦之  
上召至京師適武宗晏駕去隱武夷山中文宗  
在江南聞其名及即位以幣徵之不赴書周書  
無逸篇以進至正三年春丞相脫脫以隱士薦

授翰林待制兼國史編修官使者趣之行至杭州以疾篤辭歸伯原為人湛靜無疾言遽色篤于行義所著有四經表義六書通編十原等書學者稱為清碧先生年七十有五卒于武夷門人程嗣祖錄其遺詩為清江碧嶂集伯原自謂得浦城楊仲弘詩法嘗集宋末遺民二十九人詩百篇題曰谷音平日所作詩未嘗存橐或問之笑曰亦嘗念之然觀藝文志所載古人文集

何翅千百今其存者百無一二又有幸不幸焉  
故不必存也今集中所載應酬俚率殊不稱其  
名又安知伯原之不欲存橐者非自為藏拙地  
邪

題薛玄卿瓊林臺

上清山靈都凡山無與儔况茲瓊林臺雲氣接神州嶽  
坼扶地軸鬼神動天球珠樹粲瑤城玉衡縣清秋層冰  
積高寒梯構靡其由外史洞玄化於焉采真遊珊珊紫

霞佩皎皎明月鉤手攜千歲藤足弄萬里流仰觀玄圃  
運俯視八極周緬彼大瀛海變滅多浮漚悠然發舒嘯  
永矣此夷猶

武當山張真人奉詔禱雨有應

祈禳致風雨傳說自古先京師大旱連二年地蒸熱氣  
如雲煙林林嘉木盡槁死毋論黍稷生秋田武當真人  
張洞淵為道有心如鐵堅粗衣惡食夜不眠兩眼奕奕  
光射天天子有勅丞相宣詔君禱雨紓憂煎君坐默不

語奏達虛皇前將吏驅蛟龍雷電相後先童童雨脚晝  
夜懸平地涌水如通川穉禾出土芄芄然小草大木爭  
芳妍都人士女喜欲顛謂君直是真神仙我今為作喜  
雨篇勒諸厓石千年傳

天冠山同諸學士為祝丹陽賦

錄五

鍊丹井

鑿石通泉脈鑄鼎鍊丹砂丹成騎鶴去滿地生雲霞

逍遙巖

鵬搏九萬里，籬鷗飛只尺。所以達觀人，亦各適其適。

玉簾泉

燦爛金為屋，玲瓏玉作簾。飛泉來百道，定有老龍潛。

石人峯

臨風衣自整，對月影偏長。獨立經寒暑，真成石作腸。

小隱巖

山深人寂寂，澗曲水沄沄。顧爾非忘世，遺身在白雲。

題吉學士墨梅



冰雪肌膚鐵石腸翩翩和月按霓裳  
臨窻喜見橫斜影却有王孫翰墨香

題江邨圖

樹林蓊蔚水縈環知是江南何處山  
幾載幽并倦行役按圖欲借屋三間

題小景

秋雲滿地夕陽微黃葉蕭蕭雁正飛  
最是江南好天氣邨醪初熟蟹螯肥

題道士許冰壺遊維揚詩卷

淮南秋月漾清波  
照徹冰壺秋氣多  
二十四橋春似海  
羨君騎鶴數經過

和何得之歲莫見寄

籬下菊斑斑猶能傲歲寒  
春風誰主宰客夢自清安  
此老憐才乏何人惜夜闌  
管寧如可及浮海竟誰歎

寄題竹軒

綠竹脩脩處華軒楚楚深  
莫留雛鳳宿曉聽蜚龍吟  
月

進窻櫺影雲移几席陰居然淇澳趣莫使俗塵侵

和潘明之

欲試淮南術難期海上翁自為吳地客不記楚人風蒲  
黍隨時白葵榴過眼紅獨醒還獨醉至竟與誰同

莫春遣懷

東風吹盡滿林花底用無涯始有涯飲量素慳難止酒  
客懷雖惡少思家已諳世味茶如薺未信仙人棗似瓜  
為愛綠陰春晝永出門轉覺換年華

中秋寄高混樸

去年見月轉添愁滿地干戈未肯休動有萬人塗草莽  
豈論斗米換衾裯今宵相對還青眼後夜相逢又白頭  
尤恨故人難會合若為把酒獨登樓

秋興

兩峯高聳竝秋霄雙澗分流送晚潮月冷誰家頻搥練  
風清何處細吹簫七閩荔子丹砂顆五嶺梅花玉雪標  
黃鶻不來空悵望自歌雅曲和漁樵

送李伯循

已聞盤谷最深幽，便欲從君遂此遊。  
春氣和柔朝採藥，秋風清徹夜行舟。  
巖花冉冉難留客，汀草纖纖獨倚樓。  
楊柳新條不堪折，只須買酒換離愁。

送趙伯常歸揚州

往年初記抵京師，正類機雲入洛時。  
未說黿頭分赤管，先傳馬首控青絲。  
瓊樓舊醉家家酒，金剎新題處處詩。  
此日揚州歸去路，錦衣光采照城池。

寄楊仲弘

老來自愛黃叔度少日真期魯仲連  
高卧獨無田二頃曳裾誰有客三千  
蒼波渺渺浮鷗鷺白日翩翩換歲年  
却憶江東楊少尹劇談終夜不成眠

酬虞伯生

滿窗風雨夜沈沈獨對青燈萬古心  
徒有故人憐白髮自無奇骨換黃金  
茅簷暖日須看獻竹簡遺經正用尋  
豈愧執鞭非所好甘隨麋鹿放山林

題周南翁悠然閣

大江之東彭蠡南周家高閣與雲參  
秋風猿狖號青嶂  
暮雨蛟龍起碧潭  
遶屋千叢生杞菊  
過簷百尺長梗楠  
何時共此登臨樂  
指點山川與縱談

廉州阻風

自因三宿致綢繆  
豈為狂風殢客舟  
鄉國十年思舊雨  
河山千里記前遊  
黃雲釀雪禾將刈  
綠霧籠霞橘漸收  
離別不堪成悵望  
雁孤飛起白蘋洲

漁隱圖詩為程子純賦

山下白雲縹緲水邊紅樹依稀信有桃源深處漁人今  
亦忘歸

題柯敬仲梅

點點苔枝綴玉疎疎檀蘂凝香還記當年月色簫聲暗  
度宮牆

方布衣瀾

瀾字叔淵莆陽人隱居吳中自少時不娶閉門



讀書訓徒以自給後至元己卯卒年七十有七  
平生喜吟咏然不苟作友人樊士寬子厚錄其  
五言詩若干首其詩句如咏樂天云以詩為佛  
事隨地學山居臨平道中云煖容時借酒寒力  
曉欺綿梅花云香能占夜月春不棄茅檐夜雨  
云萬緒集雙鬢百年堪幾愁皆從苦吟得之朱  
澤民曰壯年厭世紛歲莫少知己即其人亦可  
知也

淵明

鄭聲與雅樂今我并無絃尚不歸蓮社誰能愛林田青  
山栗里宅白髮義熙年嵇阮能逃世終非出自然

荆軻

計出不可測襟期相激昂悲風寒易水俠氣小咸陽六  
國羣謀失三軍一亡當英雄幸不幸愁入代雲長

金山寺

江心勝絕處人飲不知源楚浪夜喧寺浙山晴到門清

寒入僧夢太古結雲根欲問前朝事松風若有言

早秋夜坐

萬星都讓月勢不竝光芒塵陌聞鐘靜風庭灑頂涼明  
河西落野飛露下霑裳但息人間累仙鄉不離房

秋日錢塘紀事二首

吳越南去遠萬峯青照杭江流拍岸闊海氣入城涼落  
日菰蒲暗行人禾黍香天開地闢後知歷幾興亡

阜物家家市瀕湖處處園童時今父老夢裏古乾坤佛



石千像在風潮萬馬奔誰予指新路梧落故宮垣

秋夕有感

搖落秋漸晚露香籬下花疎鐘出煙寺新月入人家蛩語日夜急鴈飛天漢斜寒余不能去塵世事如麻

初冬作

沈寥蕭瑟後霽色却怡人霜已千林曙天猶十月春黃花蝶過晚白葦鴈銜新野性自夷曠非關絕世塵

海陵道中

漠漠平楚遠扣舷歌昔遊風顛碧海岸春老綠蘋洲自  
古利名急更東天地浮客心不自得落日傍漁舟

石門夜泊

積雨莫天豁炊煙隔林起人喧落帆處野語新月裏桑  
籬綠如沃麥風寒不已一夕舟相銜擾擾利名子

春日遣懷

陸續畫船去曉風料理人泥香燕甯草路煖馬蹄塵海  
色瞳矐日花光撩亂春浮生孰無事惜取自由身

幻住菴聽松軒

不與俗同調風生高樹林  
老僧無法說滿院但潮音  
人靜野禽下雨涼山葉深  
悠然悅天籟宛自是閒人

過吳江

離離遠邨落晴不見炊煙  
秋水漲無岸野舟撐入田  
天留新稼穡人戀舊山川  
不待鴻飛定西風已肅然

石門曉行

風高木葉脫從此曉寒新  
積雨見初日遠山如故人  
煙

邨一葦渡野寺數家鄰獨念行藏異沙鷗未我馴

玄妙觀訪劉澹然

仙扉曉更寂香靄石後睨日出松杉外風來殿角西簷  
簷沐霧溼薜荔壓牆低林下非無趣浮生萬不齊

白雲先生許謙

謙字益之金華人受業于仁山金履祥盡得所  
傳之奧浙東憲府聞其名而辟之弗就廉訪使  
劉廷直副使趙宏偉先後舉茂才异等復以遺

逸薦皆固辭延祐初居東陽八華山學者不憚  
百舍重趼而至著錄者千餘人隨其村分皆有  
所得獨不以科舉之文授人曰此義利所由分  
也不出里閭者四十年四方之士以不及門為  
恥至元三年卒年六十有八世稱白雲先生賜  
諡文懿所著有讀四書叢說讀書傳叢說詩名  
物鈔觀史治忽幾微若干卷行世先是北山何  
基得朱子之傳于黃勉齋而魯齋王栢又師友



于北山仁山金氏則學于魯齋而及登何氏之  
門者也學者推原統緒以三先生為朱子之世  
適而文懿實任其傳江浙行省為請于朝建四  
賢書院以奉祠事其所傳白雲集四卷亦多扶  
翼經義張維世教之言徒以詞章論之淺矣

遣興四首

秋日常苦短秋夜不可闌葉鳴迅風晚蟲怨零露寒月  
白天炯炯振衣起盤桓山川出浮滓翳彼明不完幽興

中道絕百感來無端何當誅豐隆致身無羽翰清光亦何私不照方寸丹

猗猗澧有蘭馥馥沅有芷獵獵石上蒲泛泛水中芰鮮鮮三逕菊旒旒百晦蕙采掇集衆芳粲爛成雜佩服何所從將以待君子

春風榮衆芳秋露悴百草羲和策日月疾急兩飛鳥枯桑號天風俛仰波浩渺氣流物隨化金石不自保人生寄蜉蝣時邁胡不老天地有終窮微眇何足道

乾坤無停運清氣日夜生人居覆載間所息能不萌握  
機養天和持守如捧盈得喪固有命寵辱何足驚一身  
磐石重萬鍾浮雲輕丈夫有志願誰為吾無成

### 華蓋山

羣山如斗形華蓋氣獨壯奮身地勢高目極天宇曠周  
回萬象澄一一來獻狀中江漾孤嶼瀕海橫疊嶂樓臺  
市中居棋列相背向烈風攪滄林落日鳴白浪蜃氣薄  
浮雲溟濛杳東望長豪浸寒水短楫起漁唱同遊豈特

達竟爾忘得喪山下出蒙泉夷坐待清漲一掬襟懷空  
自謂義皇上

中川龍翔興慶寺

孤嶼浮中川晝夜汨潮汐何年地維裂中斷洲渚失兩  
峯峙東西蔽影互朝夕浮屠據稜層梵宇絢金碧飛龍  
迫風雷曾此一憩息昔時桎梏居今作大士室了師擇  
靈地為假蛟鼉窟聚沙合舊港連互如片石山扉夜無  
關神物便入出亂流攜故老一一訪陳迹軒亭倚葭葦

濤浪傍几席豫章號樓風篠簜翳寒日憑高慨今古天  
海相蕩激景在人易非悠悠意何極

莫過東津館

薄莫下東津灘急舟劇箭漁鎗互明滅隴月時隱見清  
颼從東來涼氣襲我面目送兩山青天長淨如練

遊鍾山至八功德水

悠悠鍾山雲朝夕礙我目褰衣試一往行與雲相逐驅  
馬出東門十里至山麓幽人昔已亡誰能繼芳躅猿鶴

乘古林澍澍嘯深木彼哉西方人胡為擅斯谷豈云事  
幽棲政爾眩華屋泓泉抱何德濁熱供一沃巖回屐欲  
倦小憩倚脩竹涼颼自披襟佳興亦云足

舟中雜興三首

冉冉江上蘆離離路傍草霜露侵衣裳何用涉遠道鴻  
鴈方有序孤飛任林表豈不顧其羣長風翮難矯

亭亭嶺上雲玄鶴相與飛俛啄戀故巢不得從雲歸秋  
風颼黃葉飄颻各何之羸糧事遠遊在昔聞斷機棲鳥

辭茂林徘徊更依違悠悠兩江水共此明月輝

嵐煙紫崔嵬波光滉漾星宿懸虛蓬雲雨暗逸槩震  
澤商氣深雄風駕濤浪白鷗與蒼鴈來往同簸蕩吳潮  
海門閣飛雪噴秋響重重越山迎汨汨溪流上舟行歷  
旬日佳景閱萬狀孤征抱結思所感重悽愴安得同心  
人詠歌共清賞

採藥

亭亭北山松宿藹蔭深碧蒼根走虬龍巨幹蟠鐵石平

生棟梁具不受霜雪厄兔絲得所附裊裊挂千尺流脂  
入九地千歲化琥珀我欲掇其英俯仰費搜擿紅鑪轉  
丹砂石髓變金液但恐茫昧間圖驥不可索意長時苦  
促雙鬢日夜白刀圭或可試習習在兩腋蓬萊三萬里  
詎謂弱水隔他時來山中故老應不識

用潘明之韻遣興

秋山撼虛林秋水揚素波緩衣踞蟠石怡盼庭樹柯芳  
景良可惜去日亦已多天寒道路遠奈此兩鬢何興來



勿引酒醉飲空悲歌丈夫志有適慷慨捫太阿

蕭兄臨行索詩即席賦贈

相逢嗟久別歸路復怱怱我媿今原憲君非舊阿蒙山  
風驚落木江日數飛鴻舟颺西流水明朝定向東

次韻丘呂道

汲汲時能幾蘧蘧夢未醒自憐頭染白誰解眼垂青心  
事沾泥絮生涯逐浪萍何人可私淑諸老漸彫零

秋夜二首

月落窗仍暗，燈殘卷未收。  
家人催杼柚，穉子問更籌。  
冷露蟲傳夜，淒風樹怯秋。  
百年一瞬目，萬慮幾搔頭。  
志大空懷壁，交疎少斷金。  
半生成白首，十載對青衿。  
朝市灰心久，山林託興深。  
紅塵多汨沒，清夜幾沈吟。

題延月樓

崦嵫稅駕紅塵息，玉鏡飛空天地白。  
嬋娟先得何處多，齊雲暈翥高百尺。  
清光無私照寰海，舉頭千里明長在。  
主人欲擅四時秋，夜夜掀簾為延待。  
人生見月幾圓缺。

今昔人殊同此月人迷夢覺月晦明終古相摩寧暫歇  
倚闌清嘯酒莫遲銅壺催曉輪易歇

遊龍回寺碧雲堂有何無適草書

蒼鱗作霖回壑裏竟化長岡飛不起何年老僧飛錫來  
強架檐楹萬山底碧雲石梯如登天俯視竹樹行其巔  
巖巒起伏呈怪狀壯若羣馬奔吾前何仙仙去不復返  
滿壁龍蛇驚醉眼可憐一半委塗泥况復沾危混苔蘚  
山翁摸榻妙入神永和繭紙且逼真勸君勿辭一日力

卷四十六  
為我留為百世珍君不見二王舊帖皆殘編至今不惜千金傳

馮公嶺

層巒疊嶂危相倚亂若飄風湧秋水寒松荒草間蒼黃  
照眼崢嶸三十里初如井底觀天門一峯巍然中獨尊  
縈回百折至絕頂俯視衆嶺來兒孫人言此山插霄漢  
馬不容鞭僕夫歎攀援何異蜀道難氣竭神疲背流汗  
熟視徐行路覺平心寬意適步更輕志須預定自遠到

世事豈得終無成  
我來正值窮冬月  
倚秋巖前嚼松雪  
午店煙生野飯香  
陽坡日近梅花發  
寄語悠悠何路人  
乾坤設險君勿嗔  
胸中芥蒂未盡去  
須信坦道多荆榛  
雨華臺

大江斷後誰絕前  
右踞蒼虎龍左蟠  
英雄角逐三百載  
庭花玉樹歌聲殘  
王氣消磨城郭改  
荒邨古木棲寒煙  
我來兩月不出戶  
登臺始覺天宇寬  
城中樓觀在井底  
環視百里皆峯巒  
烈風拔樹雲蔽野  
飛電霹靂驅蜿蜒

虛亭坐視河海湧平地立見波濤翻天開翳埽羣響息  
空翠削出滁和山陰陽雲雨反覆手向來喜懼誠無端  
興亡世事亦如此俯仰千歲須臾間

春城晚步分我字

紅樓鼓歇烏輪墮淺水橫舟弄漁火春風生草雉堞青  
隨處軟茵供小坐斷煙飛鳥入杳冥關市行人競么麼  
溪城斗大無遠趣目礙雲山環瑣瑣驂騑駕路或迷  
蜩鶯槍枋計非左歸同三子歌考槃茫茫宇宙誰知我

放櫂行

安溪湖平行櫂多黃頭豎兜倚櫂歌梅花照眼送寒色  
酒暈著臉生春和炎涼世態翻覆手江水長靜風吹波  
出門一笑天萬里白鷗浩蕩如吾何

三月十五夜登迎華觀

夜深來此倚闌干千里樓臺俯首看月到中天花影正  
露零平地草光寒氣清更覺山川近意遠從知宇宙寬  
長嘯一聲雲外落幾家兒女夢初殘

西山萬象亭

亂峯盡處接浮雲東望悠悠萬事陳  
百里江流縈縹帶滿城居室比魚鱗  
野僧倚竹嘯留客山鳥穿林嘯喚人  
落日亭中一杯酒何年復此對晴春

九月十七日登清涼寺翠微亭故址

梵宇崢嶸枕石頭倚風極目立荒丘  
黃花覆地初經雨白鴈橫雲帶遠秋  
城郭已非山故在江淮失險水空流  
衲僧八十仍多病杖淚殷勤說故侯



春夜次韻二首

飢烏驚鵲起南枝夢入槐柯覺亦悲  
花裏樓臺春到早竹間窻戶月來遲  
篝熏翠被鑪存火燈落紅星硯汙池  
可惜風光半塵土明朝急火報君知

兩部蛙聲似打衙披衣清坐夜紛譁  
門同靖節日長閑家近相如酒可賒  
低幕風生翻宿燕小簷雨歇落輕花  
玉琴聲斷尋幽夢回首西窗月未斜

秋莫有懷

十二闌干倚翠微  
露華寒重逼羅衣  
碧天連水思空遠  
衰草滿庭人未歸  
秋雨樓臺幾寂莫  
春風院落自芳菲  
冥鴻應有青霄侶  
為隔閒雲尚獨飛

即席用蘇世賢韻送郭子昭

攬轡春風入駿蹏  
兩隄煙柳護晴溪  
黃鸝自有留人意  
相對殘紅不忍啼

次韻潘明之秋思

西風冉冉鬢毛侵  
鳳老梧衰鎖夕陰  
倚遍闌干重回首

斷鴻千里暮雲深

夜過黃泥渡

夜深風息水安流  
白鴈黃蘆滿眼秋  
行李蕭蕭官權穩  
卧看明月過真州

李徵士存

存字明遠更字仲公  
饒之安仁人好為古文辭  
通醫術既而遊於上饒  
陳立大之門延祐開科  
一試不第即決計隱居  
三以高蹈丘園薦不應

秘書李孝光舉以自代當事者將以翰苑處之不果葺書室曰竹莊題曰侯菴人稱為番陽先生四方兵起門人何琛迎養於臨川以至正十四年卒年七十四有侯菴集三十卷仲公與祝蕃遠舒元易吳尊光三人遊志同行合號江東四先生云後人編集元詩往往有稱侯菴為明之洪武中年卒者誤也危學士素所撰墓誌年月甚明侯菴集刻於明永樂三年國子祭酒徐

旭序之謂其距侯菴之沒五十二年則侯菴已  
卒於明太祖未定金陵之先也傳聞多誤可知  
考證之難

雜詩三首

老去無所為結廬在竹莊竹莊荆棘深宿昔狐兔藏豈  
無江海願齒髮不足償生則居菴中死則埋菴傍  
秋日方杲杲獨行溪水干紛然浣紗女及此清未寒相  
語有相屬歲晏霜雪繁誰云陶唐風遠矣不可還

慕古既多沮從俗寧可安吾冠方委塵政爾不必彈羣  
醉敢獨醒孤芳若為園秋風况無情最解吹朱顏

贈胡巡檢民

志文光卿皆當年叛寇姦  
臣指近年伯顏而言也

重雲閉溼熱欲作夏至雨胡子溪上來披衣一相語南  
風解人意稍亦入窻戶開樽薦瓜韭汲井具雞黍子為  
廬陵秀家世蕃且鉅早歲走京師騫然好儀矩詩書雖  
素習殺氣在眉宇暫為巡警吏出入備鉦鼓手弓張黑  
角腰箭開白羽里曠散雞豚垣牆奔狗鼠因思閩廣間

壤地有深阻兇豪據溪洞老幼負戈弩幾微相啖噬動  
輒生齟齬古今聲教遠往往累南土整齊非束縛全活  
在綏撫荒忽固無常跳踉乃其所雖云聚蜂蟻頗亦頓  
軍旅遠道困供輸窮陬多毒蠱幸逢天子聖元帥復雄  
武前歲醢光卿今年烹志父此雖下愚者生育皆父母  
端由一念失血肉浣砧斧天道實寬容皇威安敢侮今  
聞豺狼窟悉已反農圃早暮或笙竽邛墟且商賈姦臣  
操國柄近亦死南浦詔書一日下海內盡歌舞橫算罷

舟車求賢復科舉閭閻皆跨馬流謫歸故處百祥斯可  
至萬惡為之沮顧余頭已白甚覺負章甫眼目更昏眊  
筋骸將偃僂子年纔十五聲價滿吳楚朋友實天倫磊  
落傾肺腑行當分閭櫝終可立朝著相看方侃侃索別  
何踽踽波濤隨地有切莫倦篙櫓雙雙鸛鶴來一一漁  
樵去淒迷斜照草髣髴晚煙樹出處莫為謀音書可相  
許

昔年



昔年有語雙白頭  
弃我忽作齊梁遊  
雲鴻不飛音信斷  
寶鏡塵昏秋鬢亂  
君心一去如飄風  
妾心死與黃河東  
清霜昨夜入庭樹  
欲寄寒衣不知處

次韻戚總管賦雪

長風剪水不成片  
城上將軍鐵為面  
五更吹角墮梅花  
天女騎龍淚如霰  
坐令萬瓦白參差  
人在蓬萊水晶殿  
黃河夜合鼉鼉深  
太行曉裂豺狼戰  
尚憐廬阜足佳致  
五百寒僧不開院  
崑崙朔南日本東  
未信天花一時遍

塞邊勒馬公所開橋上騎驢吾不倦  
化工作巧本容易  
臘盡春臨已三見  
明知無酒俱冷落  
豈有多情更歡宴  
長安市上一貧士  
白晝閉門何所羨

次高元博韻

亂後作

老逢盜賊繁  
俛爾度昏旭  
蕭蕭數莖髮  
連月不暇沐  
晝常雨中餐  
夜或林下宿  
深惟崑岡上  
誰辨石與玉  
茹珍蓋糠粃  
飲水即醺醖  
相逢破肝膽  
豈但皺眉目  
大宜適他所  
采擷皆可救  
竭來安且靜  
殆若立於獨  
南風滿窗

簷衣袂清不醖梅實得調鼎松明勝然燭顧此若蝸牛  
殼中少涎足故人意不滿蓬華無乃辱置酒對榴花誓  
將徙華屋吾聞學仙者隨處武夷曲矧茲秋風近白酒  
家有熟雖無魚羹飯賴與鹽齏粥

下第南歸別俞伯貞

驅車出都門別酒忽在手去國古所悲況復失良友  
芄丘中麥鬱鬱道傍柳揮手從此辭煙雲黯回首

又魚

霜風刮面冰如刀持叉入江矜厥豪投深中又始一出  
眼溫膚凍如紅桃嗟爾得食亦稍稍性命或與蛟龍遭  
安得長又一萬丈直向海中又六鰲

偽鈔謠

代為者社作帳  
辭謝尹楊思齊

國朝鈔法古所無絕勝錢貫如青蚨試令童子置懷袖  
千里萬里忘羈孤豈期俗下有姦弊往往造偽潛隈隅  
設科定律非不重奈此趨利甘捐軀縱然桎梏坐圜圉  
賸有囊橐并尊壺生平心膽死相遁口舌所挂多無辜

人生既以不堪此惡卒乃藉生危圖苦之撫楚甘酒肉  
役用在手猶拌珠或思夙昔報仇怨或出希覬傾膏腴  
搜求寧肯賸雞狗汙辱間有連妻孥何如巧遇賢令尹  
燭照劍斷神明符先窮支蔓到根本礦鐵雖硬歸紅爐  
非唯此境少憂畏亦遣鄰邑多歡愉自憐弱肉脫虎口  
從此飲水皆醍醐誓將白首至死日頂戴豈與劬勞殊  
願推此舉徧天下咸使良善安田廬

祝丹陽以古琴見惠且寄以詩次韻答之復以史

略一本為謝

涼風蕭蕭吹井桐佳懷如寶千不逢二年蹤跡走關關  
面目土炭心盲聾其茲豈異伏櫪馬雲漢獨羨高飛鴻  
詩琴遠致心甚厚金玉備具相玲瓏大珠沈淵炯不動  
朗月照水清欲空亦知廬阜入幽夢幻此三疊銀河風  
紛紛醉裏不知老有此二美誰吾同彈琴固可消世慮  
作詩乃或令人窮未如祝仙古巖下往往遇會方瞳翁  
聊將史畧報深意并問馬首何時東

山中留夜宿明日以風雨對牀眠為韻賦詩

雅性厭喧隘結廬林野中林中果何有勢利罕相從異  
哉四子心春江遡孤篷洒洒竹方雨泠泠松欲風貧家  
百無為蔬食隨所供但於文義間稍願相磨礪顧此有  
餘樂言旋胡怱怱人生難定期往往如萍蓬豈不易分  
別談諧誰與同尚懷秋花前興滿山園東豆寒始能英  
韭潤亦已叢儻或不遐棄清遊應可重

哀祝明遠

我昔遊師門與子始相識襟懷藹春氣顏色澤而哲憐  
我學無方為我數開迪子言雖懇懇奈此正茅塞他時  
七月暑子與舒元易芒屨杖而蓋訪我到荒僻松陰作  
參坐快飲不餘滴清論秋夜長草舍隨所息蚊蚋及風  
露義不作賓客別來子久病傳者亦非的但云類痞瘧  
豈意至茲極我嘗習醫藥此候頗不惑中乾而外強翕  
翕脣頰赭痰涎屢吞吐寒熱互煎逼我雖弗果問子固  
不能即寄書或浮沈遣价胡不克縱無續命方未必大



差忒一朝訃音至造物果難測老師倡絕學正賴相附  
翼譬如萬稂莠初覩一二穰有子未為多失子良可惜  
深慙病莫助執紼當致力及知己沒土尚擬瞻几席因  
循至如此過矣復奚飾昔為同舍好今有生死隔嗟我  
凡下資意欲填胷臆支離久成熟豈悟本方直靈苗不  
自愛日日縱螟蠶今雖來照徹實信已非億緝熙苟無  
怠非久當有得子雖在重泉豈不念疇昔明明為子告  
執筆重悽惻

題雲菴

夜宿雲菴中白雲滿牀頭客來雲不語客去雲不留  
明日在山下白雲何處求

義役謠

八都安仁最下都易水易旱生理無奉公往役名主首  
半是摘窮擔柴夫或因苗麥僅升斗或忝殷實元空虛  
千中得一稱上戶土赤聊當辰砂朱五更飯罷走畫舸  
水潦載道歸來晡夫丁木物諸瑣碎每以附近先供需

課程茶酒率倍開所取鹽米何錙銖逃糧逃金不待論  
職田子粒尤難輸公家督促過星火唯聽捶撻生蟲蛆  
幾年辛苦埵容蟻一界了畢鍋游魚間逢令宰賢恤者  
蘇息無術空嗟吁省府郡帖一朝下義遜得許從鄉閭  
徐君更是好義者率以公正人爭趨同時共事數君子  
但有贊協無次且出多出少由厚薄若小若大皆歡愉  
支吾縱廣非獨力欽助能幾咸安居移東走西可免者  
那上趲下歸誰歟不聞隳突到難狗但覺和睦安犁鋤

願依此舉更堅久美事無以三年拘

送徐典史歸四明

細雨堂前酒初梅雪後吟誰云新識面已是舊知心  
冉冉蓮花幕青青桂子林簞瓢千古意臨別一何深

次汪簿秋日見寄

隔水秋雲薄連山夕照荒去鷗分遠色來鴈帶初涼  
風物何常異人生亦自忙因懷吾友問醫俗若為方

送王季寶歸江西

露白邛邛曉霜紅葉飛愁邊仍歲晚客裏又人歸未  
別情無奈臨分語復遺往來黃子敬莫惜寄新詩

早起

短髮梳殘月輕裳試曉風無言渾似道多病欲成翁竹  
簡聊千載藜羹亦萬鍾昂昂非自異瑣瑣得無同

別黃俊昭

歸矣黃夫子清愁葉葉風深知疑我獨無補與人同天  
地年年老江河日日東相思有新語并寄鯉魚中

贈胡大使

黃河滄洲人

久客徒催老微名不救窮尋詩亦及我好事豈非公勲業遊天北家鄉望海東重逢知幾日小酌晚林中

周伯清秋江曬網圖

曬網夕陽斜攜壺入荻花平生誤識字恨不作漁家

懷友

美人不可見煙雨一登樓隔岸誰家竹娟娟不解愁

贈禹弼

相思不見最愁予奈此邛醪儘可沽安得片帆風色順  
一時飛過洞庭湖

題寒青亭

并序

余結菴竹莊上率平阜淺流唯南望山有連山  
如樓臺簾帷之在百里外臨川之雲林也天色  
清徹時嘗倚杖面之不能已歎曰彼生居是間  
者其樂當何如也他日蔣君自述其寒青亭者  
傳以示余余欣然賦一絕寄之時五月二十又

二日

簷頭鳥影案頭蠅  
鶯鴨溝渠漸漸腥  
想見高人延客罷  
披衣岸幘坐寒青

追舊二首

自是瀛洲第一人  
玉漿麟脯幾曾貧  
想今尚秉千金帚  
欲埽蓬萊海底塵

空谷何由滯此人  
束書萬里豈憂貧  
秋清車駕灤河上  
匹馬嘶風在後塵



夢祝直清

斜窻半夜月娟娟宿火添香獨自眠  
忽夢潯州祝經歷  
滿頭如雪坐空船

贈人

沒馬塵埃白晝馳人生得似此翁稀  
西風牆竹疎疎雨  
短帽長髯百衲衣

春帆

能舉人間萬斛舟中流何用櫓聲柔  
楊花兩岸東風軟

送盡斜陽更未收

落梅

更開殘酌不成歡  
一片多情拂袖乾  
想見孤城吹畫角  
朔風斜日莫江寒

晚步

用唐高  
蟾韻

茅屋青帘隔晚橋  
白沙紅樹水迢迢  
人生到底頭如雪  
莫管春風消不消

呈原卿蕭翁二表兄

濃露微霜菊正開  
紅梨紫栗共銜盃  
雲山百里頭俱白  
十五年間三度來

和吳宗師灤京詩

紫駝白象壯行儀  
但覺炎威日日微  
露透地椒清寶仗  
風生天棘滿旂旂  
金盤藹藹行新饌  
玉體脩脩進袂衣  
自得仙吟因想像  
半生元不離門畿

又一首  
頌聯云千  
宮擁駕雲  
朝起萬

帳隨營雪夜鋪  
亦自壯麗相稱

挽三十七代僊姑

前身知在月中央金縷瑤環夢未忘麟餌已供仙府貴  
鸞封猶被國恩長碧雲萬里簫聲遠黃壤千年劍氣藏  
空使人間有悽愴滿山松柏雨浪浪

次子勉韻二首

甲午年避地於  
彼絕筆之作也

蛇虎縱橫二載餘偷生於此計何疎俗情只欲分茅土  
國士終當顧草廬留世但知瓶有雀攜家敢歎食無魚  
試看何氏新園裏種菜牆根已藹如

疲馬常思捲旆旌如何處處尚屯兵為邦喜有漢三傑

習禮慚無魯兩生雖覺風沙成晝晦終期河漢向秋明  
買牛負耒歸鄉里沒齒簞瓢亦已榮

次何高士成道韻

許我重來意甚真山林城郭路由分十年共憶青燈舊  
一日相看白髮新促席未銜盃裏月攜鐮先割隴頭雲  
臨流儘有西風便杖屨終當逐後塵

贈別楊秀才赴真揚二州打捕提舉司都目

錦江重會各蒼然別夢驚回二十年虞府已需君入幕

詩壇猶笑我無羶瓊花月冷看騎鶴玉盃春香取獻新  
此去帆檣千里近封書到得故人邊

送倪東江之上元縣主簿

沙頭煙際挹征襟嚼盡梅花出短吟鄉黨又成千里別  
功名聊盡百年心東南形勢風流遠吳晉山河蒼莽深  
此去吟邊有萬邁客樽應與爾同斟

趙處士偕

偕字子永宋魏王廷美之後遷於慈谿自以前

代宗室不求祿仕嘗讀楊文元公遺書有省隱  
於大寶山之東麓學者稱為寶峯先生郡守縣  
令多執弟子禮受成法焉門人烏斯道序其遺  
文謂為有道之言六世孫文華重刻其詩不多  
類皆陳腐之語錄其稍蘊藉者存之

送葉伯奇入官

朔風列列海天茫茫良朋告別我心皇皇 既卜隱居  
花嶼之陽既有諸賢可以徜徉豈宜今日有茲遠行

吁嗟大道不明久矣矧我後進流俗靡靡正喜幽人所  
居依邇開我清明滌我塵滓庶其有賴日新無已不謂  
此行匪人可止 蕩蕩上帝厥鑒昭然福善禍淫至公  
無偏吾友伯寄道心本全落落默默融融淵淵於人弗  
欺常畏於天 矧今執政篤於敬賢豈不念女孝心虔  
虔豈不容女奉安爾父以享萬年

送阿里擇之都目之浮梁

古人在猷畝尚不忘乎君為官不盡職何以為人臣吾



觀四海內茫然浩無垠兵甲尚未息傷哉此良民省臺  
與州縣冠蓋多如雲真知小民苦落落今幾人先生業  
儒術其才尤出羣皇朝有此老合置要路津白髮已滿  
鬢青衫不掛身鬱鬱淹下僚壯志何由伸天寒途路長  
北風揚沙塵勛哉加餐飯此外安足云

題引子龍

黑雲萬里隨長風白日失色天濛濛老龍翻身出海底  
瞬息之間升太空小龍奮躍力尚微舉頭大叫追其宗

老龍正飛復回顧輝輝紫電生雙瞳浩然神氣兩相接  
其間變化難形容秋蟾老子寫此圖野夫一見心中忡  
苦念蒼生久枯槁焚香再拜心肅恭上祈老龍垂惻隱  
特遣龍子施神功四時膏澤及時降大有五穀年登豐  
風不鳴條雨破塊厝民壽域時熙雍龍兮龍兮有功如  
此斯不失其為真龍

送宗元始和尚之天竺維那

覺來何處有鶯鳴寒碧山中正五更遙想高人思我處

霜華月色半窗明

數聲鐘罷木魚鳴  
不管桑田幾變更  
惟有西來意無限  
一溪寒玉照人明

上人自有荆山玉  
豈愛驪龍領下珠  
楊柳湖邊天未曉  
偶隨孤棹落西吳

題梅書於周砥道宅壁間

老梅枝老花逾妙  
幾度相看正眼開  
不道夜深人正睡  
一枝隨月上窗來

送伯奇入官

日斷斜陽雁不來  
碧空無畔絕塵埃  
此心久矣堅如石  
生意蕭然冷似灰  
之子入官偏跼蹐  
誰人為我暫徘徊  
秋風已到桂枝上  
借問緣何花未開

元詩選初集卷四十七

欽定四庫全書

元詩選初集卷四十八

庶吉士顧嗣立編

栲栳山人岑安卿

安卿字靜能餘姚人自號栲栳山人以所居近  
栲栳峯也與李著作作季和危學士太樸相善嘗  
作三哀詩弔宋遺民之在里中者寄託深遠有  
俯仰今昔之思焉岑氏昆季多以科名顯者而  
靜能獨淪落不偶其簡王子英詩云平生耕稼

心媿此老病軀又云老成媿苟得童穉羞無官  
又會資敬菴詩云我窮不出門頗覺天地窄何  
其坎壈抑鬱之甚也兵火之餘典籍散佚而今  
日尚知有靜能者豈非顯晦亦各有數邪

古意四首

亭亭千歲松起自一寸植苟無斤斧患壽可比金石青  
青園中草一雨迴故色清霜忽飄零彫悴在頃刻  
寶刀不斷水綫溜可穿石君看城門軌要非兩馬力為

學不苦心虛談政何益偉哉大禹功猶思寸陰惜  
濬冲執牙算武子蓄金埒積鏹不能施名穢身亦滅富  
貴何足云道義自可悅偃蹇彭澤腰不為五斗折  
江河東入海天漢恒西流感此不息機宴安匪良謀農  
夫務耘植為學與義求青春厭老大還可回施不

百鴈圖

離離鴻鴈羣渺渺水雲國白雪剡川藤玄香牧溪迹形  
真具生意彷彿二百翼四海兄弟情於茲見敘秩前鳴

後如應高下低復逆隨陽足稻梁直夜防機弋水寒蘆  
葉黃霜清葦花白羣遊得所止一氣同悅懌哀哉淮南  
謠布粟歌斗尺東阿賦豆其才高終擯斥觀圖適念此  
翻為古人戚今人猶古人毋為後人惜

食新筍

黃虀甕已竭枯脯筐亦空老芥長芒刺食久咽為痛山  
雨折竹胎未入春盤供畦丁適踵門致我親戚送脫綳  
錦文散切玉霜刀弄新香歆湯鼎饒涎迸齒縫未倩搜



詩腸已破食肉夢參禪誠滑稽煮簞宜笑閨贊寧譜亦  
佳涪翁句堪誦僻居東海偏斯味時一中山僧應厭餐  
飽食聽春哢

盆蘭

猗猗紫蘭花素秉巖穴趣移栽碧盆中似為香所誤吐  
舌終不言畏此塵垢汙豈無高節士幽深共情素俛首  
苦有思清風颭庭戶

夢中作

積雨稍開霽晴川擢孤舟雙目豁陰翳四望餘雲收輕  
風生衣袂灑灑舒煩憂橋橫落日迴水與山俱流白鷗  
洲渚涼黃鳥林塘幽十旬九陰雨茲晴信難求美景與  
心會及莫猶遲留賓朋愜清賞晤語更獻酬歸途見明  
月華顛風颼颼

送景融姪之浙

宴安人鴟毒我老嗟無聞知汝行有日送汝寧無言汝  
父早卽世汝子衣猶斑汝弟頗知學且識應門難別家

思自奮託蔭薇花垣王侯近下士接待禮尤寬人觀所  
為主結交慎扳援期汝在遠大囑汝猶殷勤蛟龍蟄深  
壑變化斯須間鵬鷃志霄漢奮迅凌風翰錢塘萃佳麗  
比屋人煙寰寢食須自謹勿躡春風門酌此一杯酒我  
心愈憂煩功名倘相遂寄我歸來篇

次茲息菴冬日海棠韻

盈盈宮錦仙厭彼繁華場當春不自獻婉婉懷無方託  
根旃檀林金仙借恩光羣陰正凝沍特與回春陽拒霜

宜媿死江梅亦羞香翻令桃李顏應有趨時傷定惠一  
笑姿未免隨春芳始信鶴林仙解逞非時妝

和李宰韻

春風吹繁花秋露淨孤月壯年嗜好新對此每傾悅年  
來百念灰搔首惟短髮流光不我與苔生古人骨常懷  
却世紛宴坐學龜息心乎茂叔蓮興乃子猷竹從渠鵬  
去留不問焉得失李侯宦遊蹤來儗海上宅庭蘭茁春  
芽笑語落霏雪詩文嘗我過老晦資啟發窮思獨善身

自獻殊未屑對酒還當歌  
甘旨朝夕君心與我懷相  
對交歎息

灌畦

灌畦起清晨汲水甘自勞  
微露溼裳屐涼風吹鬢毛  
緬懷漢陰丈東陵亦其曹  
顧予何為者佚豫敢自驕  
日午得偃息讀書志彌高  
年饑見杭稻萬民免煎熬  
寄跡天壤間於焉遂逍遙

送任正之旋里

君居東海國投轄思釣鼇持竿三十年歸來鬢蕭騷六  
鼇不可得動盪空波濤跋涉山海間力費心徒勞惟餘  
詩酒興不負平生豪竭來三山居燕坐樓閣高開窗納  
新月展席延清飈此樂我所嗜爽氣生膚毛世人附炎  
熱反為我輩嘲窮冬雨雪途竹輿替蘭橈歸隱五磊峯  
俯視雙丸跳何當共登覽長嘯青雲霄

傷心行用李長吉韻

朔風動清吟孤月流寒素白髮困青燈紅妝泣秋雨羅

扇沿網蟲寶鑑青鸞舞白晝魍魎行山昏鬼無語

詠范氏池亭

虛亭巧結構有此觀魚境碧沼風生紋高林月留影花  
竹列我前松杉瘦而穎山環翡翠屏水瑩琉璃井書生  
東海來山水頗深省喜有鄭家湖詩文每相警

三哀詩

故厲先生

先生諱元吉字無咎號半邨  
宋末舉進士第為烏程尉

厲公予先師侃侃國髦士文詞奮白屋名識動丹宸帝

鄉眷遇殊曲宴錫豐侈青衫何足云倏忽期顯仕云何  
尉苕溪露泣秋萱死朔風撼南極黃屋繼隳圯歸棲從  
山雲松柯蔭琴史揮淚新亭悲詩窮黍離旨雪霜轉侵  
凌故里不可止漂泊海東西生計日彫靡莫年賦歸歟  
幸遂首丘志遺經惜無傳嗣續但耘耔死別三十春恨  
未致一慰何當馬鬣封秋菊薦寒水

故高先生

先生字師  
魯里先儒

我憶總角初羣立侍師魯蒼然太古姿肩髮垂素縷慨



思英發時濟濟整風度承家二百襪衣冠踵餘武馳騁  
文藻林蘗落老無遇轉盼五十春國祚倏非故荒涼東  
海濱誰復嗟聲靈幸餘慈溪翁詩文接情素孫枝復萎  
折宗祏凜無主斯文竟何辜不綴一綫緒嗟予三世交  
念此轉增慕蕭蕭務樟風悲號惘難訴

故李先生

先生字天錫號  
碧峯里先儒

吾鄉山水佳間世產英特邇來百年間接武魄寥寂蒼  
蒼栲栳峯東西峙空碧先生擅斯名挺挺無媿色馳聲

翰墨場羣彥咸辟易五色日迷眼造物祕莫測餘年付  
詩酒琴詩自朝夕晚交無功師妙語契金石談空眇生  
死奚以貧賤戚青衫固不就縱就國步華淒涼又會基  
狐兔穴遺甃我生恨後時不及風采識空餘書一編焚  
香得繙繹

題太真春睡圖

東風吹香蕩晴晝長安宮殿花如繡海棠一夜拆輕紅  
淑氣薰蒸困醇酎太真徙倚沈香亭宿醒未解春冥冥

眉峯斂翠翳秋水侍兒夾擁花娉婷玉牀膩滑芙蓉展  
水沈煙裊金屏暖丹腮融潤珊瑚溫寶釵斜簪烏雲綰  
上皇玉笛那敢吹地衣紅皺靴輕移傳令別殿罷歌管  
流鶯不語游絲垂漁陽鼙鼓邊塵動臺閣無言卿士憎  
婦人一睡四海昏主闇臣諛總如夢翠華西狩九廟隳  
禍胎未翦三軍疑馬嵬之夢生死訣一時悔禍人心歸  
驪山舉燧供歡笑犬戎蹴踏周原草丹青誰寫春睡圖  
後世不須箴太寶

次韓明善題推篷圖

青松陰陰間修竹六月脩然破炎溽梅花一味只宜冬  
江上孤舟水邊屋筆端春信回孤根鮫綃淺抹玄霜痕  
江南煙雨正愁絕一枝喚醒羅浮魂無聲詩生有聲畫  
吟咏工夫見揮灑坡翁仙去二百春夢繞松風古亭下  
茲花清致誰堪當孤山題品淵源長推篷細認心淒涼  
鼻端彷彿聞天香

題晴川圖

清溪粼粼生淺花  
曉日倒射搖金沙  
翩然雙鷺下危石  
玉雪照影無纖瑕  
溪邊小景入圖畫  
青煙綠樹漁翁家  
漁翁歸來歌未終  
鷺鷥忽起蘆花風  
回眸遙望不可極  
但見白玉飛青空  
昔年夜宿瀟湘浦  
徹曉不眠聽急雨  
解衣曳杖立沙頭  
何似今朝得容與  
長安馬寒泥沒腹  
雪滿朝衣凍肩縮  
試令援筆題此圖  
長篇應賦歸來曲

二月二日大雪偶賦時寓州郭

東風吹寒春漠漠  
海氣作暝天昏昏  
空階夜落雪一尺

起看萬樹梨花雲詩翁捫鬚僵不死開窗強作飢猿蹲  
欲呵凍筆寫清思甕中餘漚催頻溫山僧積財富畎畝  
驅馳役事何紛紛木魚停撾磬聲絕但聽衙鼓趨公門  
何如孤舟釣魚叟一蓑獨釣寒江濱

出門偶賦

老驥伏櫪風蕭蕭飢鷹側目看青霄驪龍抱珠海底卧  
虎豹不噬羣狐嗥河邊老人倚牆坐六合茫茫彈丸大  
平生賸讀古人書倒篋青錢無一箇側聞朝廷遺逸徵

集賢著作空盈庭紫微堂上日羊飯世祖山河如砥平  
予觀近時詩人往往有以前代臺名為賦者輒用  
效顰以消餘暇

章華臺

周網陵夷九鼎輕玉帛交錯朝蠻荆熊虔北睨志未已  
積材壘土攬青冥姬姜麗質鄭衛音臺中燕樂森如林  
汾沮遠畧肘腋變乾溪一散愁人心荒山飢走歸無所  
睡酣又失涓人股棘闌深閉魂魄飛申亥負尸埋淺土

章華臺上空子規  
嘯殺游魂終不歸

姑蘇臺

吳王築土山為址  
俯視水雲三百里  
臺中歌舞萃華麗  
金碧巔岼眩珠翠  
江花泛泛浮鷗夷  
會稽思霸甘卑辭  
千金不買西子笑  
一舫竟逐陶朱歸  
丹砌草深麋鹿卧  
淒淒棘露沾人衣  
闔廬丘墓虎為衛  
至今鐘磬聞餘悲  
遊人不悟國傾亡  
松間援筆題真娘

朝陽臺



巫峯十二青參差石形儼現仙娥姿蒼藤翠木怯淒冷  
精誠夜感襄王思仙衣縹緲仙裙溼雲影飄飄雨聲急  
陽臺朝莫不勝情高唐想像愁無極夢中寄遇事杳冥  
公子雕辭亦胸臆荒涼古廟屹江干臺空不見行雲跡  
遊人悵望尚徘徊古碑寂寂荒莓苔

### 黃金臺

雕牆峻宇無不亡薊城築宮國乃昌屈身延士禮優異  
四方英俊如雲翔郭生馬喻真良策亟拜樂卿為上客

兵行旬日入臨淄秦楚諸君咸辟易夙心已雪先生恥  
七十齊城祇餘二君王仙去主帥逃歎息後人非繼志  
魏臺悲慘朔風號不知騎劫何時招

歌風臺

嬴秦北築聲萬里芒碭無人識雲氣鴻門斗碎驪山焚  
漢楚殘民半為鬼重瞳失道身首分沛公酒敘還鄉恩  
風雲飛動白日永歌聲激烈悲勲親四方備禦思虎士  
進取守成良不易長陵崇奉四百春歌臺遺築今荆杞

壯哉一曲大風歌千古英雄盡懷愧

戲馬臺

彭城負險河為障南屹崇臺勢雄壯重瞳奮跡入秦回  
諸侯攬轡皆東向酒酣蹴馬升崔嵬髮翻鬣振雲煙開  
倚鞭四顧示無敵指揮貔虎心雄哉黃金間行亞父去  
帳下茫然失謀主楚歌聲合潰重圍昔日名騅空故步  
千年積恨氣未消繞臺泗水撞飛濤

望思臺

金莖擎露空崔嵬湖臺築恨心猶哀剖桐殞土事曖昧  
禍機元自長生來壽踰大耋世已稀趙國憮人心險巇  
盜兵誅佞兩非是屈篋督戰猶驚疑銜冤竟殞鳩泉里  
壺關三老言非遲向無少卿護病已上林僵柳何緣起  
空餘老淚滴紋甃斑斑相間苔花紫

銅雀臺

漢室分崩成鼎峙銅雀羣飛鄴宮起碧甃漾日覆紋鴛  
蕙帳凝香集餘妓我觀叔始既驕逸後高馬知惕奢侈

洛陽宮闕凌青霄公卿負土何焦勞玉音親責役夫緩  
瞬息身首橫霜刀荒遊日恣典午肆西陵空掩欺孤智  
至今硯墨抱遺羞千古姦雄穢青史

鳳凰臺

萬里長江東入海千年高臺今尚在當時誰道鳳凰來  
覽德何人足相待鳳聲悠悠梧葉空謫仙文采流長虹  
跨鯨一去不復返後人欲語羞雷同海上三山渺何許  
羣仙騎鳳隔風雨登臨空詠謫仙詩白鷺斜飛過秋浦

八月上旬出遊晚歸

拷峯老人頭雪白竹扇如箕障炎赫徐行阡陌稻花間  
稚子歌呼手高拍西風吹我衣巾輕鷺鷥飛起鸛鵲鳴  
西山一餉挂龍雨薄莫歸來新月明

題張彥明所藏翦紙惜花春起早圖

流蘇帳卷春寒輕紗窻弄碧天微明輒紅嬌紫怯朝露  
美人推枕心為驚鬢雲未綰香奩開侍兒側立肩嬰孩  
黃鸝飛動花影亂停梳畔晚猶相猜誰將妙意寄工巧

溪藤雪瑩金刀小丹青退舍松煤枯翦出天真數分杪  
奎熙傾軋空自誇惟競時人顏色好無聲有聲兩相副  
此景此詩均壓倒司空見慣了無言應是禪心被花惱

美人行

錦雲罕地春風軟彩鸞影展烏雲綰繡茸慵理怯餘寒  
寶兒煙斷花陰轉露晞香逕苔蘚肥鳳襪溼翠行遲遲  
憑闌無語何所思默看雙蝶花間飛

防盜夜行

翠蘿滴露絳緯鳴熠燿照影秋水清輕雲度白河漢明  
月挂半壁生東溟幽人不寐起夜行鐵搗攫地鏗有聲  
綠林豪客慎勿驚白晝大盜猶縱橫

求葉仲興寫墨竹扇面

此君一日不可無子猷篤愛心歡愉延平官舍斬伐餘  
稽山倦客心煩紆先生拋官南海來胸中丘壑爭崔嵬  
筆端造化奪天巧籀龍一夜驚春雷素絹團團翦秋月  
願染玄霜寫幽絕蕭然便覺風雨生頃刻清寒屏炎熱



昔時與可稱絕倫  
息齋近世尤逼真  
我持此扇出門去  
要使機材咸萃君

逢秋

高梧脫葉金井寒  
璧月夜挂珠闌干  
銀河萬里浸虛白  
凌風欲訪乘槎仙  
金壺箭水聲第一  
畫角梅花聽悽惻  
三山樓閣碧海涼  
老鶴不眠清露滴

謝李仲容見贈

海風立水天空濛  
瘴雲晝掩蓬萊宮  
仙人跨鶴天姥東

歸來樓閣昏無蹤九仙山高玉為戶廣寒夜訪乘鸞女  
桂香滴露夢不成看徹霓裳羽衣舞宮袍舞錦花翩翩  
詩成毛骨生清寒飛章贈我歸剡川推蓬月在梅花邊

次王敬助見寄韻三首

開元古名刹獨客思凄然不佩六國印元無二頃田吾  
猶甘自守人政不須憐堪笑陶朱子西施共上船

琴書曾遠訪訪我海東濱對酒不成醉看花惟惜春青  
燈書有味白眼世無人儘有耕桑趣脩然一幸民

祕圖留滯日鄉思已淒淒黃卷挑燈閱紅妝掩鏡號交  
新情僂僂感舊恨低迷語及深知處應憐獨鶴棲

八月十九日宿慈水車輪橋野人家夜聞犬吠有  
一人立門首忽問曰雞鳴否詰之乃入縣膺役者  
蓋卜夜之蚤晚恐違官事也感而枕上有作

官道月朧朧微雲弄薄晴居人聞犬吠行客問雞鳴王  
者化無外公家事有程民心雖謹畏何日是昇平

九月三日晚與鄭元秉對坐至日莫小雨後歸宿

偶成

歸人歸未得天際復生陰  
小雨溼官道清砧傷客心  
蕭肥蘭蕙瘦雀語鳳鸞  
磨坐對滎陽老空懷正始音

夏夜偶成

雨下山雲黑雨收山月明  
涼風蚊蚋散活水蚓蛙鳴  
露頂中庭坐披衣曲砌行  
遙憐荷戈士觸熱入占城

沙縣小樓

半載客延平沙陽夢愈驚  
蛩鳴深巷靜月昃半樓明  
故

國三千里歸途一月程西風在庭樹締綌不勝情

寄易禮弟

越客半年住閩溪千里流山高不礙夢日莫易為愁兄  
弟終相憶鄉閭非所憂何當先壘側同理釣魚舟

簡王東皋

劍光飛射斗牛寒應笑如今缺尚彈萬國梯航朝帝闕  
百年禮樂付儒冠黃金用盡無顏色白髮交深見肺肝  
重念蒲輪東魯客莫年名動漢朝端

重峯寺祈雨後簡李元善

塵尾高揮演大乘，火雲不散愈崢嶸。  
漫同三島吟詩客，

閒訪重峯醉酒僧。

僧謂竺西

翠竹陰移涼夢遠，碧蓮香散莫

雲凝。歸途未即天瓢注，猶有長風解鬱蒸。

去華山人洪希文

希文字汝質，莆田人。其父巖虎號吾圃宋貢士。

為興化教諭。希文其次子也。巖虎與坐萬山中。

朝晡盂飯燒芋咬菜相侶，和無愠色。巖虎有集。

曰軒渠希文因自號續軒渠集巖虎卒嗣為鄉  
先生郡之名族爭致西席郡庠聘為訓導大賓  
延請無虛歲卒時年八十有五以生年考之當  
生于前至元壬午卒于至正丙午實與元代相  
終始郡人林以順謂其詩得意處皆自肺腑流  
出至于造語鍊字之法頗費工夫易隱卓器之  
曰吾圃試校游洋翁季枕邊談詩以僧敲未敢  
一言定烏過曾安幾字來之句授之夜卧三鼓

聞書聲云有子定知吾事足貧家頗覺此聲佳  
志喜云甫譏失學難為比琰見趨庭喜可知所  
謂是父是子自成一家機軸者也

閏八月郡庠小集呈高一初廣文并會間諸老

今年中秋月不見白玉盤天公莫省事留待閏月看解  
后至此夕萬里雲漫漫孀娥為誰怨不肖驂素鸞尊酒  
興不盡聊借今日歡庭前桂花開更覺酒量寬隨寓皆  
可樂何必遊廣寒相從君子堂餘慶由衣冠當時金谷



園徒起長恨端丁寧坐中客慎勿嫌冷官東籬菊漸黃  
尚可供遊觀

聞清漳近信

龍逃海水熱簡書亦足畏蹇蹇皆王臣或有獨勞悴有  
司輸軍儲風颿往供餽朔風卷櫓槍願散旄頭彗蒼生  
豈不困督貴太煩碎側聞良家子坑塹紛填棄坐視若  
不聞勇壯失鼎鬪毋負朝廷恩泥沙傾廩餽猖獗迫河  
隍踟躕果何遲埃鼓日夜鳴擊鮮交勞吏燕寢尚宵衣

健兒獨搴幟聖祖仁立國垂統千萬祀方隅有竊發敢  
不趨父事宜推子弟恩疾痛肸膺臂奈何當此時反若  
秦越視太平日已久兇惡無噍類富庶非不多休禎靡  
不至何當穢濁清凱奏歡童穉使我閩閩翁翹首瞻佳  
氣

送林景惠和興化教諭三首

華星何歷歷際此時休明嚮來章甫冠太平皆長纓某  
也收科第濯濯邦國楨某也收書禮擬作觀光行儂亦

清浪兜歲月徒崢嶸壽陵欲進步蹇澀路不平豈不念  
憔悴借譽無公卿逝將買一廛空谷為畊氓歌聲出金  
石聊以陶吾情

朝遊夾漈山漈水何漣漪莫登石門山山石亦差差水  
石太古色山人去何之君今遊此山為予訪顏基多謝  
吹藜翁七畧今有歸矧茲十室邑文獻猶庶幾君子樂  
育才薪樵理不遺白袍久延佇雪立風披披煦之以惠  
風暢若春陽熙前程雖云邁來者猶可期

夾漈鄭夾漈  
所居石門陳

聘君  
所居

昔我侍吾翁設教山水鄉  
樞衣琴冊暇問禮俎豆行在  
寢皆淵騫籍湜走以僵  
五年飽藜苒麤羈甘我腸  
別我事瓦解改邑從新岡  
秦荆暗丹雘歸然魯靈光  
回首三十年追憶成荒唐  
獨有溪水聲絃誦獨琅琅

貧甚食草具作

赤莧赤如脂苦蕒甘如飴  
盤登惡草具味等薇與芝  
賢哲逝已遠昧昧余所思  
伊人既忘世此外皆若遺  
梁肉

世豈乏飽死黃胎兒千金渥注種歲晚鳴枯萁尚餘耽  
書癖不與塵土緇此樂豈在外簞瓢猶山雌蹇劣安所

性所恨生清時

揚子法言修身或問回之簞瓢懼如之何曰明明在上百官牛羊亦山雌也

閻在土簞瓢梓茹亦山雌也何其服

癸酉閏三月十六日仙邑館所兒子琦入夢悵然

不憚後八日自解

人生壽幾何過若飛鳥速詎云垂老日欠汝淚一掬棄  
來將一期觸感常在目夜夢或見之恍若牛舐犢回頭

語鍾琰此子豈不蓄得非愛惑聰戲我如蕉鹿吾年在  
桑榆期汝猶絲竹胡為舍我逝世事如水覆嗟哉六如  
身悟道講已熟莫將恩愛刀更刻風中燭

枕簟入林僻

朱夏困蒸鬱城市多淫哇閒招嘯雲侶來食山中霞山  
中有何好泉石端可嘉清溜接筧筒火種憐菑畚枯松  
偃澗壑赤日流丹砂茂林無珍禽智井空謹蛙桃笙寄  
憊憊菊枕便昏花煩襟頓消釋密蔭爭交加羲皇有神

交蘧廬等仙家久坐令人健微吟到日斜浮雲滄海狗  
歧路常山蛇祥飈偶披拂哀音餘摻撾山深民多醇鄰  
酒亦易賒去去下巖扃歸途暝棲鴟

嘗新橄欖

橄欖如佳士外圓內實剛為味苦且澀其氣清以芳侑  
酒解酒毒投茶助茶香得鹽即回味消食尤奇方宮商  
舌底發星宿胸中藏雖云白露降氣味更老蒼山林假  
歲月顏色饒風霜以茲調衆口誰敢輕頡頏作此橄欖

詩遠繼葑菲章大器當晚成斯言君勿忘

擬古呈賀郡公

喬林巢獨鶴自愛經幾秋戛然伸其喙衆鳥噤不啾  
啄玉山木渴飲清渭流豈不念饑渴芳潔慎所求翹首  
仰雲衢亦有健翼遊雲衢非吾事所性林泉幽林泉有  
何樂雞鶩相與儔賊糧固其性耿介難自謀雞肥鶴日  
瘠漫自高一頭况又去其半半載不見訓衆禽詭然笑  
餓死予爾羞餓死則猶閒未死將誰尤

揚子學行頻頻  
之黨甚于鷓斯



亦賊夫糧  
食而已

續鼎夷中傷田家

貿貿丘麥秀  
蛭蛭吳蠶生  
微行執懿筐  
亦既受厥明  
上馬給王賦  
下馬紆官征  
豈為饑寒念  
所念瘡痍平  
哀哀生理窄  
了了無餘贏  
惻怛夷中詩  
萬古田舍情

讀涑水司馬公和金陵王半山烘蟲

文人語多工  
徽纒自繩糾  
嚙蟲至么麼  
謂可懸戶牖  
胡為大車軸  
貫心竟何有  
禦寇近道翁  
縱此瀾翻口  
景略

疎救時袖此無用手挂名青史中遺笑傳不朽後世為  
美談姓字記誰某二公廊廟資力可扶宇宙如何唱酬  
間爬剔便絮垢仁義蝨其官有益國家不三歎商君書  
掩卷重搔首

初冬述懷十四韻戲簡周介福陳仲敷二先生

顓頊方用事威節何辛酸百卉無遺秀千林變成丹陰  
風日淒厲梯此長恨端妖豔不可極子生尚多艱寒爐  
守煤爐枯條滿青山乾釜憶澆潯甘井生波瀾新霜骨

髓痛永夜衾裯單病馬聞飢嘶露猿聽號寒起坐復痒  
瘰有酒難為歡愁如匪澣衣何時思一浣棄置兒女悲  
壯志生羽翰况當警寇盜戒備嚴鄉關願請受長纓殄  
彼為民殘天乎矜其能夕死意所安

題聖墩妃宮湄洲嶼

我昔纜舟謁江干曾覩帝子瓊華顏雲濤激射雷電洶  
殿閣碑兀魚龍間此洲仙島誰所構面勢軒豁規層瀾  
壺山峙秀倒影入乾坤擺脫呈倪端粉牆丹柱輝掩映

華表聳突過飛巒湘君小水幻靈骨虞帝跡遠何由攀  
銀樓玉閣足官府忠孝許入巫咸班帝憐遐陬雜鯨鰐  
柄授水府司人寰五雲殿邃嚴侍衛仙衣發駕朝天關  
危檣出火海浪破神鬼役使忘險艱靈旗毳毳廣樂振  
長風萬里翔孔鸞平洲遠嶼天所劃古廟不獨誇黃灣  
至人何心戀桑梓如水在地行曲盤升階再拜薦脯藻  
不以菲薄羞儒酸日談書史得少暇石橋潛度凭雕闌  
詩成不覺肝膽醒松檜蒼蒼鳴玦環騎鯨散髮出長嘯

追逐縹渺乘風還

書夏政齋欠仲背面美人圖

鬢髻高髻宮樣妝天風飄飄雲錦裳心華未肯開桃李  
縱有粉黛難輝光怪渠何事長背面百歲風花能幾見  
雲收雨散易傷神齊魯姬姜顏色變當時畫史筆亦神  
風流醞藉作大伸丹青意在毫素外縱使貌得非天人  
可憐前代汗青史薄命佳人類如此幾多寵極愛歇時  
失意長門暗宮裏老人耳冷不欲聞世上兒子徒繽紛

摩挲喜見法眼淨為君起炷鑪中熏

飯牛歌

牛吒吒蹠趵趵枯萁啣盡芳草綠自晡薄夜不滿腹  
擷菜作糜豆作粥飼飢飲渴兩已足脫紉解銜就茅屋不  
愁飢腸雷轆轤風簷獨抱牛衣宿丁男長大牛有犢明  
年添種南山曲

煮土茶歌

論茶自古稱壑源品水無出中濡泉莆中苦茶出土產

鄉味自汲井水煎，器新火活清味永。且從平地休登仙，  
王侯第宅鬪絕品，揣分不到山翁前。臨風一嘖心自省，  
此意莫與他人傳。

聽琴歌

疎簾曲檻蘋風涼，細腰美人藕絲裳。神閒意定丰度遠，  
玉指纖纖彈履霜。喬林鶯囀日卓午，幽澗泉鳴夜未央。  
孤鸞別鶴生暗恨，毋以冰炭置我腸。

癸酉六月十四日臂痛不自聊戲作短句

卿不見將軍力挽十石弓勇沒矢筈寒氣隆又不見翰  
林醉揮數寸管勅賜宮袍天色晚古人文武具全材但  
見伎倆忘形骸君看朱亥椎晉鄙袖千鈞鐵何偉哉詩  
翁不復作是夢磨墨研丹足吾用晴窗卷手不停披塗  
竄典謨箋雅頌天公何事不見憐坐失肩背生憂煎頑  
然自覺不屬體縱有杯杓令誰傳諸君莫笑老無力他  
日為郎能執戟

春寒無炭



古人坐客寒無羶我今為客寒無煙東風兼領玄冥權  
今年春寒過去年梅子含酸實未堅薺麥雖茂胎未全  
海棠羞澀開紫緜山南山北無杜鵑詩翁縮頸聳兩肩  
玄龜守殼凍不前吟成呵硯冰尚堅毛穎蹇澀非張顛  
喚起石鼎句再聯倚牆道士鼻息喧此時得酒真解仙  
博取一醉真可憐君不見雲安斗水直萬錢杜陵雖老  
性命懸畫灰對雪思悄然忍寒披絮夜不眠半頭何日

雙錦纏

曉行途中書事

冥發昧所適東西覺惘然門敲邨店酒鍾落客津船猿  
叫荒山月雞號墟里煙回思在家日日晏尚高眠

讀杜拾遺老瓦盆戲作

此翁坦率性長享甕頭春觴客終顏玉傾人嬾注銀干  
戈塵世淚風月草堂身賴爾有蘇鄭情親不厭貧

杜詩  
早歲

與蘇鄭痛  
飲情相親

獨立

雨後衡門立郊垌晚氣清鴨頭流水淨魚尾斷霞頽竝  
舍開新釀平疇餉晚耕微吟扶柳栗信步自閒行

少睡

少睡多宵坐占星看碧虛病根常檢點客氣久消除清  
有焚香癖臞因服藥疎眼前書未讀肘後看方書

郊行

天亦自多事一春勞應酬哺雛衝雨燕喚歸出林鳩有  
累俱闕抱無生始斷愁忽逢林下士羞默但低頭

龍華上人餽白粲

報道龍華老驅車入市迴如何迫歲出端為餽年來香  
鉢停留供朱門迤邐開也應憐范叔莫遣甑生埃

覽鏡戲作

塗抹東西遍牀頭膏沐香恐為嗔老物不敢近新妝翻  
覆百年態淒涼數寸光道心無老少憔悴亦何傷

述近懷示諸庚老

與君同甲子霜鬢白于銀朋舊歸新鬼乾坤信老身干

戈猶未替盤殘幸相親句法如江鮑如何救得貧

癸巳新春作

盜賊生涯困回頭盡戰塵春來長是病老去不如人屋  
小香常集杯深酒尚醇何時洗兵甲同作太平民

寄潘茂

別後聽鳴鶻君曾有夙期如何三閱月不寄一聯詩獨  
立海山對相思沙鳥知端能乘興否一葦諒非遲

客中遇寒食二首

長到清明寒食時客懷如夢復如癡庭空月淡梨花少  
雙冷煙寒麥飯遲阻隔家山常入夢挨排節物可無詩  
暮年自是難為別非為栖身近子規

桑柘村村已禁煙蕭條井邑傍山前了無詩酒空三月  
如此時光又一年對景鶯花如寄爾見人兒女倍潛然  
業儒不及為農好麥已登場蠶又眠

壽峯翫月

素娥准敕六丁擎下照塵寰似水晶河漢無雲天萬里

溪山不夜月三更蓬萊弱水何曾隔玉宇瓊樓無此明  
今夜壽峯峯絕頂與君端坐細推評

秋聲

悚動西南底不平觸于金石碎鍛錚氣回海島波濤勢  
令壓邊庭人馬聲膽薄生憎窗紙擘夢迴錯認枕稜驚  
壯懷何事銷磨盡宋玉中年白髮生

蒲萄

走架龍鬚弱不支炎天待月立多時醞醕縱美輸清滑

瓊瑤雖圓讓陸離珍異曾誇太冲賦纍垂已入退之詩  
當年若得傳方法博取涼州亦一奇

仙邑館所歸溪行書觸目

杏花深處酒堪賒來訪漁翁溪友家短塹插籬防鹿豕  
小舟牽網截魚蝦鄉村畜牧連荒野墟落人煙閣淺沙  
自是昇平生聚乂女郎共唱後庭花

春半採花

芳菲著雨便成苔問訊東君幾日回閨月不曾花下去



今朝偶到樹邊來，幾何間濶罵偏老。如此生疎蝶也猜，  
流水時光容易過。舉頭枝上已青梅。

菜羹

雨後過畦嫩甲長，士夫此味未能忘。筠籠採擷朝舖供，  
土銚烹熬雨露香。鹽豉勻調仍點露，香粳細擣旋加薑。  
老饕賦好人爭誦，喚醒歐生為洗狂。

春晚郊行書所見

柳下經行不礙車，莎平草軟綠陂斜。雨餘溪澗淺深岸，

金  
卷四十八  
門外野棠紅白花隔水明邊知晚照倚山盡處是誰家  
隨他亭館春皆好擬看東鄰果下車

種竹

移得霜根趁雨栽牆陰踏破一方苔甫能引汝清風到  
未暇招渠俗子來猿訝便當書案立鶴知蚤避釣船回  
不妨更了歲寒計早晚栽松兼種梅

首夏偶成

春光恰好便分違一眺園林綠正肥幽草早闢牌印出

浮花遠卸轡銜歸蛙王踞坐楚歌發蝶使行成漢騎圍  
快入時妝佻閨子也將締綰換春衣

清明遊陳氏園亭

村村花柳暗晴川百五時光過客然

一作不暫延

綠暗園林

尚佳節清明亭館自新煙喜逢熟食傳遺俗

一作老

怕著

新衣學少年惆悵東園花似雪人生底處勝樽前

糖霜

春餘甘蔗榨為漿色弄鵝兒淺淺黃金掌飛仙承瑞露

板橋行客履新霜攜來已見堅冰漸嚼過誰傳餐玉方  
輸與雪堂老居士牙盤瑪瑙妙稱揚

陪東泉郡公作霖料院

雨

登檝江水亭

峩峩高閣臨江渚千古驚濤拍石磯  
瓦棟龜魚知客至水天霞鷺背人飛  
奔流電激玻璃碎激灩風生杖屨微  
文采風流舊朝士岳陽景物尚依依

朱千戶自京歸

幾年食玉桂為薪不染京華一點塵  
孤雁旅懷沙漠雪

蹇驢詩思灞橋春  
紆朱喜換頭銜舊衣錦榮歸鬢髮新  
海晏河清予日望與君同作太平人

春晚同數客遊靈巖廣化寺書所見

塔外青山匝四圍  
澗邊流水遶松扉  
白雲一塢僧常住  
紅杏數枝春漸歸  
雨足人牛耕曠野  
山深鳥雀哢晴暉  
長廊嚮屨皆明禁  
口自忘言心自非

新秋客中

一望澄江欲盡頭  
鄉園斷絕使人愁  
江山遼邈英雄老

河漢微茫天地秋蛩助吟聲風淅淅雁傳客信水悠悠

眼前有句懷王粲煙樹重重倦倚樓

汝質集中警句如題靈巖廣化寺云

佳句不隨飛鳥盡名山可想屬僧多守歲云沈香已帶寅前氣臘酒初間子後香水仙花云月明夜色玉連鎖露冷秋筵金屈卮夏政齋推府再舉留莆郡鎮守云作賦重遊前赤壁題詩一笑再玄都雪髭云功名不建頭顱老日月如馳解肉生幽居云舊書餘草風搜遍好樹開花月送來官築城垣起衆墳石云淒其死者無歸路羞與讐人共戴天皆自成一家機軸酷肖其父所謂以似以續是也

牡丹

國色酣朝酒天香散曉風荒村蜂與蝶老死菜花叢

書畫扇

世上無名鳥人間絕色花始知天地闊未盡入唐家

夜坐偶書

燈晦客無寐牀空夜不眠淒涼心下事月到小窗前

無題

二八當筵舞柘枝東塗西抹賽新奇而今粉暗脂冷  
嬾忒翻騰十樣看

田舍曲

杏花開後雨如煙  
燕子來時水滿川  
眉雪老翁芻一束  
省犁扶犢出新田

明皇太真避暑安樂圖

已剖冰盆金粟瓜  
旋調雪水試涼茶  
宮娃未解君恩暖  
尚引青罍汲井花

周廣文溥別莆且半載地遠不及奉狀

闕

自

杭簡莆諸老離索之懷見于言外次韻奉謝聊發  
千里一笑



軒渠許序索詩催別後東園不寄來幾度將心付潮去  
夜深和月又飛來

幽居二首

柴門掩斷徑生苔坐閱東君幾往迴看盡牀書無客到  
殘花風送過牆來

投老安間世味疎深深水竹葺幽居牀頭昨夜風吹落  
多是經年未報書

寒食途中書事

去年召募赴霞城塵暗貔貅百萬兵又是去年去時節  
數聲啼鳥斷人行

二月梅花

奪得冰姿過歲華遠離塵垢迴堪誇即今年少多脂粉  
只恐春光不稱花

春晴

鷓鴣聲歇日曛曛山谷溪橋煖信通花柳村村自生意  
青鞋布襪逐春風

至正庚子十一月二十七日夢中作

并序

予嘗暇日讀前賢夢中得句或覺而足成之嘗  
以為迂忽于是夜夢與前埭林學成相聚視其  
書几上有二絕句以釣魚為題中間有小魚巨  
鱗為韻予語曰小鹿角為小魚以全鱗勝巨鱗  
輒書一絕以遺之既覺而忘學成二絕不知胡  
然作此語也書以記之

煙波蕩蕩寄閒身  
筐筥攜歸色似銀  
莫笑江湖釣竿子

擔頭挂得兩全鱗

袁檢閱士元

士元字彥章慶元鄞縣人德祐忠臣鏞之孫性  
至孝父患背疽吮之立愈年幾四十未嘗求仕  
御史與林以茂才薦授縣學教諭調鄖山書院  
山長危參政太樸薦為平江路學教授擢翰林  
國史院檢閱官不赴築城西別墅種菊數百本  
自號菊邨學者所著書林外集七卷太樸為之

序稱其詩清麗可喜往往自放於山顛水涯之  
間與山僧逸人相與為倡酬何其興致之高遠  
也子珙孫忠徹皆以相術知名珙別號柳莊嘗  
識明成祖於潛邸者也

### 送張路教

北風何栗烈木落清霜飛天高鄞水寒客子話別離三  
載縣博士官冷苦自縻青燈坐深夜竹屋風淒淒齊人  
報及瓜喜色浮雙眉翩然告歸去浩氣不可羈丈夫太

阿劍斷玉如切泥綠塵凝古匣豈終韜光輝縣邑聊小  
試才大當優為天空鴈影寒日暮煙光微行行各自勵  
勿歎功名遲

和呂晉齋三教飲韻

我昔湖上游悵望湖中嶼相去咫尺間一水頗修阻地  
偏禽鳥樂春靜花自吐欲往興復闌佳期空側佇

用呂晉齋和鄭以文望霞嶼寺韻

倚杖立湖曲夕陽明遠嶼隔水見招提游興浩難阻輕

舟蕩輕波魚吹浪花吐四望山意佳推篷吟復佇

題慈隱菴

高僧以慈隱遠在石橋西地接支郎寺門臨孝子溪松  
風斜落徑竹影亂侵畦不見中巖老荒邨獨杖藜

題蘭水仙墨竹

上林春又老在野抱幽貞泣露丹心重凌波玉步輕孤  
山初雪霽三徑午風清志操渾相似何妨共結盟

和元善郎中

水館春將晚，凭闌靜自吟。  
蜂粘飛絮起，魚噉落花沉。  
濟世身無術，鄰邦賊又侵。  
臨風搔白首，空負讀書心。

和松石齋寒食客中

王孫歸未得，芳草接平蕪。  
邊報不時有，鄉書絕迹無。  
馬憐橋外洗，猿憶洞中呼。  
客邸又寒食，故鄉天一隅。

送張月卿

野水秋風起，孤邨落日清。  
寸心江百折，雙鬢雪千莖。  
邨迴羣鳥合，天高獨鴈鳴。  
題詩送歸客，遠別不勝情。



簡樓伯容

雨霽江城晚涼生六月秋鳥栖煙樹暝螢出水邨幽殘  
笛鳴鄰巷嚴更起郡樓故人何處在新月柳梢頭

北門團練貝子美

四野尚風塵民生日轉貧誰知持戟士亦有讀書人過  
客多憐我深衣不稱身晚來歸侍母莫為點行頻

送信字中住龍翔集慶寺

梵王宮闕皆名山金陵佳麗非塵寰龍蟠鳳翥氣磅礴

樓臺縹緲煙霞間上人昔年住東海雨袖天香雲靄靄  
磐陀石上迎朝暾潮音洞口瞻神采尋幽近復游天童  
萬松徑裏支吟筇寒泉迸石影清淺高崖挂月光玲瓏  
祇今飛錫凌雲表妙高臺上天花繞秋風江漢動餘思  
何日留衣一傾倒

和劉德彛海棠

主人愛花如愛珠春風庭院如畫圖  
褰衣曲徑步花影翩翩夜月飛長裾  
海棠睡起春正美花貌參差玉人似

主人吟賞夜不眠直欲題詩壓蘇子

米貴

去年避寇荒農天今年捕寇無客船  
江頭白米纔一斗索我三百青銅錢

喜雨三十韻

并序

重光大荒落之歲自春而夏不雨兼月東作幾  
廢郡幕有為民憂者控辭力請畚耨呂鍊師設  
壇致禱不三日甘澤霈然官吏交慶實五月一

日也因以三十韻紀其事

仙術由來能致雨誠心所感可回天公家既盡祈禳禮  
洞府宜分造化權明處浙東雖大郡鄞居海右乏深淵  
每惟嘆旱憂為甚况歷饑荒恐復然春後一犁方欲動  
田無勺水絕堪憐木龍謾吼江頭月秧馬猶沉屋角煙  
病暍征夫心正折望霓農叟眼將穿此時奚啻千金直  
民命危如一綫懸郡幕有官偏惻隱旻天無路莫黃緣  
遴才幾度詢諸老薦口咸推汝獨賢閉戶固辭徒至再

下車力請寢勤拳一箋丹悃求嘉應即喜玄機妙幹旋  
衆覽但知惟兀兀神飛誰識自翩翩心香虎閨初無阻  
膏澤龍宮詎敢專蜥蜴捧符來洞口神祇森仗立雲顛  
頓驚百辟爭趨事始覺羣巫乃備員電逐劍光纔動處  
雷轟印令未施前天瓢乍滴終傾倒月額初開漸復連  
別院始看庭積雷前邨已見水行田秧針被潤青而秀  
菜甲分甘綠且鮮壤畝田翁驚破塊井甬竈婢喜添泉  
乾禽澡羽鳴溪樹涸鮒揚鱗躍澗川竚見桑麻還鬱鬱

行吟花竹正娟娟槐邊市有新鳴屐柳下塘無久繫船  
已埽螟氛消毒暑漸清燕寢飽高眠童謠爭唱昇平曲  
祖帳高題志喜篇試術葛玄應斂衽論功束皙可隨肩  
世人獨歎重玄祕真宰多憐一念虔往歲作霖頻復見  
鉅公題石久曾鐫誰知白首當今日猶為蒼生作有年  
題城西書舍次韻

自笑茅檐多野意水邊栽柳翠成堆鶴因無恙老猶健  
燕若有情貧亦來曲徑斜穿花影入小池低傍竹陰開

故人有意能相訪細啜茶甌當酒杯

題西山傳菴

新築茅菴僅數楹翼然輪奐出林坳溪頭春水繞籬白  
門外曉山當戶青山妓折花來供佛老樵弛擔坐聽經  
憑誰作賦能招隱我欲依巖結草亭

送李叔易郎中之閩

茅檐僅隔幾漁罾五載無由識李膺牛渚月明船久泊  
龍門春暖客初登三山果熟催征騎四月萼香憶舊朋

奈爾相逢又相別何梁攜手復何能

送柴養吾先生游四明山

春游清興已闌珊送子扁舟獨上灘諸老漫期花下醉  
好山應待畫中看曉行嶂霧侵衣潤夜漱溪泉透齒寒  
林壑夏涼宜避暑主人瓜熟許分餐

送沙字丁平章孫秉彝

秉彝又名長壽者寓項菴  
前監生江浙宣使軍功舉

鄞邑監有母七十航海  
北歸丁亥五月十二日

公孫年少尚輕肥回首誰知世事非萬里荒煙迷故道



半江斜日照漁磯  
帆開雨後南風正  
家指天邊北斗歸

我亦乘桴浮海去  
沙頭白鳥故飛飛

按丁亥歲為至正七年是冬沿江兵

起八年遂有方國珍之亂彥章又有和王從素感時一詩可見其素志矣其詩云十載中原未解兵生民逃難散如萍移家楚峽嫌山淺飲馬淮河厭水腥壯士守邊頭盡白老夫憂國淚交零何時四海還歸一使我王心喜再寧

### 和江亭納涼

晚來避暑水邊亭  
短髮蕭蕭涼思清  
笑摘藕花嬌欲語  
細看鷗鳥淡忘情  
月依檐轉窺人近  
風逐潮來拂面輕

適意不知身坐久漁邨漸見一燈明

和嵯縣梁公輔夏夜泛東湖

短棹乘風湖上游湖光一鑒湛於秋  
小橋夜靜人橫笛  
古渡月明僧喚舟  
鴛浦藕花初過雨  
漁家燈影半臨流  
酒闌興盡歸來後  
依舊青山繞客樓

和松石舍人秋夜不寐

拋書欲卧意遲遲  
坐聽秋聲思慘悽  
螢火獨飛侵幔小  
星河斜落壓城低  
牙籌歷歷隨更轉  
燐鬼啾啾隔水啼

更為挑燈移近榻與僧相對話曹溪

過高錢探子章及禪寂詠心源不值

載酒東湖歲已闌擬同朋舊醉開顏長鬚吟客近入郭  
多病老禪纔出山霞嶼寺連寒水遠月波樓鏤暮雲閒  
停舟自對梅花酌雪壓孤篷夜未還

鄞之青山乃衣冠文物之地潛齋劉公實居是焉  
僕往歲與象山樊公天民長燈卓公宜之皆嘗讀  
書於斯暇日潛齋與吾二三子徜徉山水間以詩

酒自娛如此者十有餘年後僕回里諸公亦漸散  
處近云此地為鬱攸所廢良可歎也茲聞潛齋宅  
甬東去僕書舍不遠因述舊懷寄之

彈鋏歸來感舊游天涯何處話離愁青山有分長為客  
白髮無情忽上頭冠蓋盡隨雲影散樓臺近逐電光收  
聞君近卜江邊宅仍許閑情共白鷗

借韻咏城南書舍呈倚雲樓公

曉倚吟窗曙色開江頭野趣亦佳哉平蕪宿鳥衝煙起

遠浦春帆帶雨來，間種石田供鶴料。  
旋開園沼買魚栽，讀書自古城南好。  
擇地多慚吏部才。

寄小溪周復禮

書閣閒吟祗自凭，短簾風峭酒微醒。  
向陽溪岸梅先白，得雨山田麥漸青。  
老衲倚筇林下寺，野翁待渡水邊亭。  
寄言歸隱濂溪客，新歲還來了舊經。

九日後有感

滿城風雨重陽後，客况淒然歎薄游。  
白酒黃花非舊日，

烏巾素髮是今秋時艱開口難成笑事往驚心轉覺愁  
無復山東有兄弟鴈聲莫遣過南樓

謝樊天民先生朱以仁先生謝德清見訪并述懷  
詩思蹉跎四十餘未窮經業鬢先疎歸來自媿窮途客  
枉顧多勞長者車荷葉池塘疎雨歇榴花庭院晚晴初  
吟懷浩蕩憑誰遣幾向東家借蹇驢

遊東湖醉中歌

青山偃蹇不可呼我行青山如畫圖蕩舟春波竝山去

青山盡處橫陂湖周湖一百二十里湖波極處山孤起  
下臨滄海上青天南有浮屠抱山址事幽興集天風來  
乘風便欲歸蓬萊憂長未釋天地隘眼闊稍覺心顏開  
酒酣重踏孤舟發此興平生浩難遏橫山西去復清溝  
屠蘇巧構林巖幽園翁翦花春在手蟠迴石磴窮雕鏤  
興盡歸來月猶在盤礴解裝春靉靆呼童置酒復徘徊  
明月清風如有待臨水軒窗次第開玉山自倒非人推  
吁嗟勞生快意少故園茅屋今蒼苔明朝陰晴未可必

攜手重遊定何日借我仙人九節筇直欲拄上太白峯  
頭立

題寒江獨釣圖

堪笑江湖幾釣徒朝來相喚暮相呼祇今風雪蒙頭處  
回首煙波一箇無

題水西軒和府推何德孚韻

積雨荒池水欲平軒窗長夏有餘清吟餘一枕滄浪夢  
卧聽風荷受雨聲



上陳達卿架閣

金猊香透小窗紗  
蓮幕歸來日未斜  
掩却竹扉清晝靜  
呼童汲水更澆花

雨中遣懷

雲壓低檐雨未收  
隔林猶聽叫鉤輈  
詩翁慣作天涯客  
滴碎空階不解愁

夏日山居

疎簾拂拂颭南薰  
睡起茶春隔岸聞  
蠶老已收松上雪

金匱要略卷之四十八  
麥黃初漲隴頭雲

甲子七月廿二日忽坐後聞彈鶴

鶴立高枝暫爾安無情蕩子彈金丸  
老來還有冲霄志  
莫作投林倦翮看

暮雨

山北寒雲去復還  
黃昏院落雨珊珊  
數聲捎入芭蕉上  
不道愁人獨倚闌

孤梅

玉骨冰肌迴不羣  
羅浮山下幾黃昏  
應時桃李知誰在  
月冷霜清欲斷魂

水仙

醉闌月落金杯側  
舞倦風翻翠袖長  
相對了無塵俗態  
麻姑曾約過潯陽

張溝南端

端字希尹江陰人  
博學好修以薦授  
紹興路和平書院  
山長歷官海鹽州  
判官浙江行樞密  
院

都事人稱為溝南先生所著有溝南漫存藁子  
宣洪武初與修元史擢翰林編修

和傳可除夕

歷盡年俱往寒多火未銷為憐無去日翻恨有來朝  
世路看何隘家山望更遙雙娥鐙影裏翦綵待元宵

和秦仲對雨

雨多檐溜響潺潺矮屋深窗面面關秉燭襟期憐晝短  
看花心緒恨晴慳銀塘水滿鷗先下翠幙春寒燕未還

執戟揚雄今白髮久無夢到紫宸班

次韻酬馬國瑞都司二首

老去人間百不宜  
晷長何補歲陰移  
絕憐識字翻投閣  
肯為窺園廢下帷  
一樹梨雲迷醉眼  
十年春草誤歸期  
倚闌片月能知我  
故故穿雲照影遲

寂歷東風草盡生  
綠陰啼鳥過清明  
江山望眼他鄉美  
雨露懷思我輩情  
身老不堪春去速  
名虛底用晚來成  
才難自古人興歎  
一將賢於萬里城

穹窿寺次倪雲林韻

穹窿佛寺買臣居臺殿猶存漢代餘山勢盤陀真是畫  
泉流宛委遂成書從渠說夢迷蕉鹿著我眠雲聽粥魚  
十頃薄田桑八百南陽只合卧茅廬

城南游次秦仲韻

城南與君十日游柳條拂蓋花迷舟穹窿上方青未了  
點綴時見雙飛鷗花深湖曲不肯住直欲尋源過湖去  
軍裝小妓起清歌爭看風流漢都護亭臺已荒廢鹿走

笑指吳王闕

紛紛往事何足論  
冉冉流光暗中度

小年看花花在眼  
只今看花花隔霧  
故園樹樹開東風  
油幕金鈴有誰護  
人言花落春與歸  
未省春歸在何處  
縱令翦綵強留春  
不禁青天走烏兔  
古人秉燭良有以  
行樂及時恐遲暮  
明朝滿地綠陰多  
青草池塘吠蛙怒  
我歌君飲君鬢黑  
我衰強歡須酒力  
顛秦蹶劉且勿言  
翻雲覆雨何由測  
人生所貴肝膽傾  
有酒不飲難為情  
杜宇苦向春山鳴

和楊孟載對花五詠

種花以娛情而必去惡草草惡人所憎不似花枝好莫

教花易飛花飛迫人老歲晏孰華予行樂宜及早

右種花

春風方袞袞春雨亦疎疎江南二三月好花無處無看

花不知疲飲酒須百壺明朝酒重載紅雨落紛敷

右看花

灼灼樹上花枝枝可攀折折以贈所思亦復自怡悅今

日顏色好明日風光別年年送清明一樹東闌雪

右折花

萬井夜雨歇一枕春日紅開簾買花看恰與去年同花



枝固須好人生自飄蓬未信賣珠兒不作白髮翁

右買花

見花心目舒惜花懷抱惡日日池上行片片風前落盈

盈一春愁脈脈無處托殘紅抱餘香遺恨芳洲泊

右惜花

澄江詩社賦得斬白蛇劍

芙蓉秋水湛青萍曾伴高皇起沛亭蛇斷恍聞神姬泣  
人傳疑帶鮑魚腥山河帝業憑三尺雷電龍光護百靈  
却笑豐城深瘞土精英空射斗牛星

大雨

海上雷驅雨人間陸可舟羣龍低在野雙燕急歸樓楚  
甸連天暗吳門六月秋咎徵誰任責珍重廟堂憂

秋懷

半年旅邸愁聽雨七夕樓頭偶見星竹樹蒼蒼思故國  
江山歷歷話新亭誰家素練敲明月獨我絺衣步廣庭  
住向錦城心未樂自緣垂老感飄零

答大方厓禪老

吟得詩成寫貝多維摩問訊意如何貪看案上傳燈錄

不管前門奏凱歌寸寸婆羅低作樹  
纍纍窄堵亂成波  
黃花翠竹西風外杖履無嫌屢見過

擣衣

為擣清砧素令人念藁砧近寒將鴈至  
入夜正蛩吟霜  
月三更杵闌山萬里心金風何太弱  
不與送餘音

答秦仲感秋

關市樓居小似車讀書聲怕惱鄰家  
自憐不及雙鷗鳥  
占斷溪南十畝沙

賓鴻吟

鴻鴈來天雨霜鴻鴈去春日陽鴈來鴈去如嘉賓寒寒暑暑愁殺人一聲叫落秋空雲不覺淚下霑衣中如賓又復如兄弟吁嗟人兮不如彼

張仲簡云此數句勝作大篇闕係世教

送徐仲盟還松江

十年不見南州士吳下相逢涕泗橫鬢髮蒼蒼俱老大襟懷耿耿尚崢嶸年來江上魚無味夜半雲間鶴有聲明日扁舟入空闊岸花汀草不勝情

白苧詞送孟季成崇明同知

歌吳歌舞吳舞吳兒蹋浪鳴雙櫓  
春風袞袞送行舟  
新除使君衣白苧君衣一何素  
娟娟照青年飄搖舉長袖  
亦足相迴旋白衣之白白於鷺  
看時莫使緇塵汙

白頭母次徐孟岳韻

白頭母結縞亦嘗作新婦  
雞皮鮎背行龍鍾數挽青屨  
不掩股自從夫壻死軍中  
夜夜西風吹獨樹問之言是  
餘杭民義兵當年起閭伍  
生子誰如孫仲謀憂國誰如

祭征虜白頭母自傷還自語情知有生不如無人間何  
似黃泉路記妾當年出嫁時人言李下元無蹊只今餅  
沈寶釵折縱守貞心何足埒醜非鳩盤茶妒悍裴談家  
妍非張麗華解唱後庭花豈學乳媪嫁竇老竟使世人  
呼阿奢白頭終當死邗塢有足何曾入城府近聞金雞  
夜半啼天子肆赦平淮西白頭母命在緣忽得見太平  
無此骨東家箜篌急於雨西家銀箏移鴈柱請君彈作  
白頭吟莫放哀聲入雲去

和姜將儀寒食韻

倦拈重碧擘輕紅困坐江城似酒中  
送却春光三月雨吹來花信幾番風  
人離桑梓艱難遍淚灑楸梧感慨同  
浩蕩煙波千萬頃苦愁無地著溪翁


酬秦仲納涼三絕

庭樹團團散夕陰浴蘭步屣懶冠襟  
殘蟬猶戀餘薰好故故長縑獨繭琴

空庭坐待月華生蓮葉吹香到骨清  
誰把銀箏彈別院

聽來多是斷腸聲

池上尋詩繞百迴  
何須東閣對官梅  
靜中賞識人知少  
一箇山螢度水來



元詩選初集卷四十八